

22.8 BESKRYWINGSPUNT STREEKSINODE BOSVELD OOR PRAKTYK OM SIONSLIEDERE IN EREDIENS TE SING (Artt 52, 319)

- A. Ds JH Grobler stel die Beskrywingspunt.
- B. **Besluit:** Die Beskrywingspunt word verwys na Kommissie Liturgiese Sake 2.
- C. Ds LJ Buys rapporteer namens die Kommissie Liturgiese Sake 2.

D. BESKRYWINGSPUNT

1. Beskrywingspunt

Dat die praktyk om Sionsliedere in die gereformeerde erediens te sing in samehang met bestaande Sinodebesluite en die kerkregtelike reëling van KO, art 69 deur die Algemene Sinode van die GKSA uitgeklaar word.

2. Motivering

- 2.1 Die besluit van die Nasionale Sinode van 2006 tot strukturele eenheid was 'n onvoorwaardelike besluit tot eenwording van al die kerke in Gereformeerde kerkverband in Suid-Afrika waarvan die volle konsekwensies nie op die Sinode 2006 bespreek is nie (Acta 2006:387 ev). Gevolglik is daar nie gesprek gevoer en besluit hoe die Kerke KO, art 69 gaan toepas nie.
- 2.2 Die eenheid in kerkverband moet ook in die liedere wat ons in die erediens sing, tot uitdrukking kom. (Kyk uitgangspunt ten opsigte van eenheid Acta 2006:387, art 2.3.1).
- 2.3 Dit is algemeen bekend dat die kerke van die Nasionale Sinode Potchefstroom volgens KO, art 69 Psalms en Skrifberymings in die erediens sing terwyl ook vereistes vir die Belydenis berymde lied reeds goedgekeur is op Sinode 2006. Dit is ook bekend dat Gereformeerde Kerke uit ander Sinodes (bv die ou Klassis Capricorn) ander liedere in die erediens sing as wat gereël word deur KO, art 69.
- 2.4 Die Nasionale Sinode het vereistes gestel waaraan liedere moet beantwoord voordat dit in die erediens gesing kan word (bv Acta 2006:557, art K2). Kerkeenheid binne een Sinode behels dus dat liedere wat in die erediens gesing word ook beoordeel sal word aan die hand van vasgestelde vereistes.
- 2.5 Hierdie aspek van kerkregering behoort op die gepaste meerdere vergadering bespreek te word omdat dit 'n saak is wat ons ten diepste raak in die geografiese eenwording van die kerke in een kerkverband na 2006.

3. Versoek

Die Algemene Sinode Januarie 2009 word versoek om leiding te gee en gesprek voering daar te stel om hieraan aandag te gee by kerke wie Sionsliedere sing.

E. RAPPORT VAN DIE KOMMISSIE

1. Beredenering

1.1 Oorsaak

- 1.1.1 Dit is nie (soos motivering 4.1 van Beskrywingspunt aandui) die besluit oor die herindelings van Klassisse van 2006 (Acta 2006:387 ev) wat die problematiek rondom die sing van die Sions- en Lutherse liedere laat ontstaan het nie. Lank voor die herindelings van Klassisse (KO, art 48) was kerke uit verskillende kulture en tale reeds een kerkverband wat dieselfde Belydenis en Kerkorde onderskryf. Die kerke het mekaar rustig ruimte gegee vir die verskeidenheid in kerksangpraktyk, al was dit tegnies in stryd met KO, art 69.
- 1.1.2 Na die herindelings van Klassisse het die kerke van verskillende kulture in praktyk nader aan mekaar beweeg en het die verskillende sangpraktyke groter invloed op mekaar begin kry.
- 1.1.3 Die spanning/uitdaging/verskil in sangpraktyk het dus nie in 2006 ontstaan nie, maar slegs meer duidelik na vore gekom

- 1.2 Die verskille in sangpraktyk is prakties van aard en spruit voort uit verskillende geskiedenis- en kulturele agtergronde en is nie prinsipiëel van aard nie.
- 1.3 Die prinsipiële eenheid wat reeds bestaan, moet steeds meer praktiese gestalte kry
 - 1.3.1 Die instrument wat ons het om aan hierdie eenheid 'n praktiese gestalte te gee is KO, art 69.
 - 1.3.2 Die onderlinge ooreenkoms in KO, art 69 (bedienende norm) om eenheid en waarheid in kerksangpraktyk te laat realiseer, dra tans eerder by tot die spanning in kerksangpraktyk. Die artikel stel die sing van alleenlik Psalms en Skrifberyminge as enigste wyse om aan die beginsels van waarheid en eenheid in kerksang, binne die GKSA te voldoen.

2. Aanbevelings

- 2.1 Dat aan die Beskrywingspunt gevolg gegee word, en wel, in die lig van die beredenering op die volgende wyse:
 - 2.1.1 Dat Deputate aangewys word met die opdrag om elkeen van die verteenwoordigende kerke se unieke situasie en uitdagings oor kerksang in die liturgie te identifiseer en KO, art 69 toe te pas.
 - 2.1.2 Hierdie te benoemde Deputate moet verteenwoordigend wees van al die verskillende kerkkulture, verkieslik kundiges rakende kerksang asook persone wat die tale van die bepaalde kerke magtig is.

Besluit: Goedgekeur. Aan die Beskrywingspunt word gevolg gegee.